

**2023-mut Ilassutissatut aningaasaliissutitut Inatsisissatut siunnersuut**

(Aningaasaqarnermut Akileraartarnermullu Naalakkersuisoq)

**Saqqummiussissut****Siullermeerneqarnera**

Matumuuna Naalakkersuisut sinnerlugit 2023-mut Ilassutissatut aningaasaliissutitut Inatsisissatut Siunnersuut saqqummiutissavara. Inatsimmi atuuttumi atuarneqarsinnaavoq Aningaasaqarnermut Akileraartarnermullu Ataatsimiititaliamit akuersissutigineqartut ukiumoortumik ilassutissatut aningaasaliissutissanut inatsimmi ataatsimoortinneqassasut. Taakkulu ukiumi aningaasanut inatsiseqarfiusumi tulliuttumi Inatsisartut upernaakkut ataatsimiinneranni oqaluuserineqassapput.

2023-mut Ilassutitut Aningaasaliissutitut inatsisissatut siunnersuut taamaalilluni kingumoortumik aningaasaliinertut isigineqassaaq. Aalajangiinerit 2023-p ingerlanerani aningaasaliissutitut allannguutissat pillugit Naalakkersuisut kiisalu Inatsisartut Aningaasaqarnermut Akileraartarnermullu Ataatsimiititaliaata aalajangiiffigisimasai ilassutitut aningaasaliissutitut inatsimmi aqqissuunneqarput. 2023-mut Ilassutissatut aningaasaliissutitut Inatsisissatut Siunnersuummut ilanngunneqarsimapput ilanngussaq 1 aningaasaliissutit 2023-mi akuersissutigineqartunik takutitsisoq aamma ilanngussaq 2 2023-mi oqaasertaliussanut allannguutitut akuersissutigineqartunik takutitsisoq.

2023-mut Aningaasanut Inatsit aamma 2023-mut Ilassutissatut aningaasaliissutissanut Inatsisissatut Siunnersuut ukiumut aningaasanut inatsiseqarfiusumut 2023-mut aningaasaliissutaasunut tamarmiusunut takutitsiffiupput. Taakku aningaasaliissutaasut Nunatta Karsiata 2023-mut Naatsorsuutaanut tunngaviussapput. 2023-mut inaarutaasumik naatsorsuutit 2023-mut Nunatta Karsiata Naatsorsuutaaniissapput.

2023-mut Aningaasanut Inatsit IST-mut missingersuusiarineqarsimasoq 16,1 mio. kr.-nik sinneqartooruteqarfiussasoq aamma IS-imut missingersuusiarineqarsimasoq 6,1 mio. kr.-nik sinneqartooruteqarfiussasoq takutitsivoq.

2023-p ingerlanerani ilassutissatut aningaasaliissutitut akuerineqarsimasut IST-mi inernernut missingersuutaasunut ataatsimut isigalugu 250.000 kr.-nik ajorseriartitsipput. Ajorseriarneq Inatsisartut Suleriaaseq pillugu Ataatsimiititaliaata missingersuummik akuersissuteqarsimanerannit malitseqarpoq. IST-mi inernerit annikitsuinnarmik ajorseriarnerat pissutigalugu 2023-mut aningaasartuuteqarnissamut killigisaq malinneqarpoq, tamannalu 2023-mi missingersuutitut inatsimmi maleruagassat naapertorlugit aalajangersarneqarluni.

Tamanna tunngavigalugu Ilassutitut aningaasaliissutitut Inatsisissatut Siunnersuummi takuneqarsinnaavoq ukiumi aningaasanut inatsiseqarfiusumi 2023-mi IST-mut

missingersuusiarineqarsimasoq 15,8 mio. kr.-nik sinneqartooruteqarfiussasoq aamma IS-imut missingersuusiarineqarsimasoq 5,8 mio. kr.-nik amigartooruteqarfiussasoq.

Taamatut oqaaseqarlunga Naalackersuisut 2023-mut Ilassutitut aningaasaliissutininut inatsimmut siunnersuutaat Inatsisartunut kajumittumik suliassanngortippara.